

**Headlines**

- 1 प्रधानमंत्री नरेन्द्र मोदी हुंदी जी-7 यात्रा मुकम्मल। उनें विश्व मंच पर भारत दे नजरियै गी पेश कीता।
- 2 गृहमंत्री होरें जम्मू कश्मीर च सुरक्षा स्थिति दी समीक्षा आस्तै उच्ची सतह आली इक बैठक सददी।
- 3 महत्वै आले उधमपुर-श्रीनगर-बारामुला रेल लिंक पर रियासी बारामुला बश्कार रेल सेवा शुरू होने लेई तैआर।
- 4 जम्मू कश्मीर सरकारै मकामी निकायें च ओबीसी आरक्षण आस्तै पिछड़ा वर्ग आयोग गी कायम कीता ऐ।
- 5 टी-20 क्रिकेट विश्व कप च भारत अज्ज फ्लोरिडा च ग्रुप स्टेज दे खीरले मैच च कनाडा कन्नै खेडोग।

**PM Return**

प्रधानमंत्री नरेन्द्र मोदी होर ईटली थमां अज्ज बडलै नमीं दिल्ली परतोई आए न। प्रधानमंत्री होरें इस दौरे गी कामयाब ते सार्थक दस्सेआ ऐ। इक सोशल मीडिया पोस्ट च उनें आखेआ जे एह इक महत्वै आला जी-7 शिखर सम्मेलन हा, जित्थें उनें विश्व मंच पर भारत दे नजरियै गी पेश कीता। विदेश मंत्रालय नै आखेआ जे इस दौरे च जी-7 संगठन तैहत मुख्क वैश्विक मुद्दें पर सार्थक गल्लबात होई। मंत्रालय नै गलाया जे इस दरान शिखर सम्मेलन च हिस्सा लैने आले देशों कन्नै भारत दी सांझेदारी होर बी तगड़ी होई ऐ। श्री मोदी होरें दौरे दरान जी-7 शिखर सम्मेलन च हिस्सा लैता। उनें ईटली दी प्रधानमंत्री जियोर्जिया मैलोनी, बरतानिया दे प्रधानमंत्री ऋषि सुनक, फ्रांस दे राष्ट्रपति इमैनुएल मैक्रों ते यूक्रेन दे राष्ट्रपति वोलोदिमिर जेलेस्की सनें नेकां लीडरें कन्नै दपक्खी गल्लबात कीती।

**HM-High Level Meeting**

केन्द्री गृहमंत्री अमित शाह होर जम्मू कश्मीर च सुरक्षा स्थिति ते श्री अमरनाथ जी दी सलाना यात्रा दी तैआरिएं दी समीक्षा करने आस्तै कल इक उच्ची सतह आली बैठक दी प्रधानता करगन। गृह मंत्रालय नै दस्सेआ ऐ जे उपराज्यपाल मनोज सिन्हा, राष्ट्री सुरक्षा सलाहकार अजीत डोभाल, केन्द्री गृह सचिव, सेना, पुलस, जम्मू कश्मीर प्रशासन ते गृह मंत्रालय दे आला अफसर इस बैठक च हिस्सा लैगन। श्री शाह होरें कल गै नमीं दिल्ली च गृह मंत्रालय दे वरिष्ठ अफसरें कन्नै बैठक लाइयै जम्मू कश्मीर दी सुरक्षा स्थिति दी समीक्षा कीती ही।

**DGP-Kathua**

जम्मू कश्मीर पुलस दे महानिदेशक आर.आर.स्वैन होरें अज्ज कठुआ जिले दी हीरानगर तैहसील दे ग्रां सैडा सोहल दा दौरा लाया, जित्थें हाल च गै सुरक्षा कर्मिएं दऊं आतंकिएं गी मारी मकाया हा। पुलस प्रमुख होरें पुलस ते सुरक्षा बलें दे जुआनें कन्नै गल्लबात कीती जिनें टाकरे च पाकिस्तानी आतंकवादिएं गी मारी मकाया हा।



## Congress Terror

जम्मू शैहरा सनें होरने थाहरें पर आतंकी गतिविधिएं दे उपरोतली फैलाने पर चैता जतांदे होई कांग्रेस नै सरकारै गी आखेआ ऐ जे ओ हर कीमत पर आतंकवाद दी नकेल कस्से ते इस ब'रे सितम्बर तगर जम्मू कश्मीर च विधानसभा चुनां जकीनी करोग। कांग्रेस दे कार्जकारी प्रधान रमण भल्ला ते वरिष्ठ उप-प्रधान रविन्द्र शर्मा होरें आखेआ जे जम्मू खित्ते च आतंकी वारदातें च तेजी कारण हालात चैता आले न ते उनें मंग कीती जे राष्ट्र विरोधी तत्वे कन्नै निबड़ने आस्तै सुरक्षा बले गी जिम्मेवारी दित्ती जा।

<><><><><><>

## Nitin Gadkari-Karan Singh

शिड़क, ट्रांसपोर्ट ते राष्ट्रीय जरनैली शिड़कें सरबंधी केन्द्र मंत्री नितिन गडकरी होरें जम्मू कश्मीर दे साबका मदर-ए-रियासत डॉ. कर्ण सिंह हुंदी श्रीनगर आली रिहायश जाइयै उंदे कन्नै मुलाकात कीती। इस दरान केन्द्र शासत प्रदेश जम्मू कश्मीर च शिड़क ते राष्ट्रीय जरनैली शिड़कै सरबंधी औंदी परियोजनाएं बारे गल्लबात कीती गई। मीटिंग दरान क्षेत्र च सामरिक महत्व आले मूलढांचे च बाद्धा करने बारे मुख् ध्यान दित्ता गेआ जेहदा मकसद मेल-संपर्क च बाद्धा करना ते आर्थिक तरक्की च सहायता करना ऐ। गल्लबात दरान केन्द्री मंत्री होरें डॉ. सिंह होरें गी जम्मू कश्मीर राष्ट्रीय जरनैली शिड़कै, दिल्ली-कटरा एक्सप्रेस वे ते जाजिला सुरंग परियोजना समेत बक्ख-बक्ख महत्व आली परियोजनाएं दी प्रगति बारे जानकारी दित्ती।

<><><><><><>

## Uttarakhand Accident

उत्तराखंड दे रुद्रप्रयाग जिले च बद्रीनाथ राष्ट्री जरनैली शिड़कै पर रेनतोली कश सैलानिएं दी इक गड्डी दे खाई च पौने करियै 13एं लोकें दी मौत होई गई ऐ। हादसे च गंभीर तौरा पर जख्मी 7 यात्रुएं गी हवाई रस्तेयां एम्स रिषीकेश लैता गेआ ऐ, जिल्ले के होर दुए 7 जख्मिएं दा इलाज जिला अस्पताल च चला करदा ऐ। राष्ट्रपति द्रौपदी मुर्मू होरें इस हादसे पर डूहंगा बसोस जाहर कीता ऐ। राज्य दे गवर्नर गुरमीत सिंह, मुख्मंत्री पुष्कर सिंह धामी ते केन्द्री गृहमंत्री अमित शाह होरें इस हादसे पर दुख ते बसोस प्रगट कीता ऐ।

<><><><><><>

## Rail Link

उधमपुर-श्रीनगर-बारामुला रेल लिंक दा 338 किलोमीटर लम्मा महत्व आला संगलदान-रियासी रेल लिंक इस म्हीने दे खीरै तगर कम्म करने लेई तैआर ऐ। परियोजना च एह इक महत्व आला मील दा पत्थर ऐ ते मेद ऐ जे इस लिंक राएं म्हीने दे खीरै तगर इस रस्तेया रेल कटरा पुज्जी जाग ते कश्मीर घाटी गी रेल राएं देसै दे बाकी हिस्से कन्नै जोड़ी देग। आकाशवाणी संवाददाता देवेन्द्र ठाकुर होरें दस्सेआ जे रेलवे दे आला अफसरें कल रियासी दे डिप्टी कमीशनर विशेष महाजन हुंदे कन्नै संगलदान ते रियासी ट्रैक दा निरीक्षण करियै ट्रैक गी शुरू करने आस्तै खीरी जरूरतें दा जायजा लैता।

<><><><><><>

## OBC Commission

जम्मू कश्मीर सरकारै मकामी निकायें च होर दुआ पिछड़ा वर्ग ओबीसी लेई आरक्षण दी सहूलत लेई पिछड़ा वर्ग आयोग दी स्थापना कीती ऐ। सुप्रीम कोर्ट दे हुक्मै दी पालमा करदे होई जम्मू कश्मीर यूटी सरकार दे कनून मैहकमे नै नगर पालिका ते पंचैती चुनां च ओबीसी ताई आरक्षण दी बत्त पदरी करदे होई आदेश जारी कीते न।

<><><><><><>

## Swankha Mela

कल्लै थमां शुरू होआ करदे बाबा सिद्ध गोरिया नाथ गी सस्वांखा दे हफ्ता भर चलने आले स्वांखा मेले लेई जिला प्रशासन सांभा नै सब्बै लोड़चदे प्रबंध करी लैते न। मेले च केन्द्र शासत प्रदेश दे कन्नो कन्नी गोआंढी राज्यें थमां बी ज्हारें बद्धे श्रद्धालु हर बरे इस ऐतिहासक मेले च हिस्सा लैदे न। इस आयोजन लेई प्रशासन आस्सेआ सुरक्षा दे सुद्धे बंदोबस्त कीते गेदे न।

<><><><><><>

## Sahityaq Academy

साहित्य अकादमी नै इस बरे दे साहित्य अकादमी बाल साहित्य पुरस्कार ते साहित्य अकादमी युवा पुरस्कार दी अज्ज घोषणा कीती। साहित्य अकादमी बाल साहित्य पुरस्कार लेई 24 लखारिएं ते साहित्य अकादमी युवा पुरस्कार आस्तै 23 लखारिएं दी ताल कीती गई ऐ। अकादमी नै दस्सेआ जे ताले गेदे सब्बने लखारिएं गी 50-50 ज्हार रपे ते इक तांबे दी पट्टिका भेंट कीती जाग।

<><><><><><>

## Udhampur-Yoga

औंदी 21 जून गी 10में अंतर्राष्ट्रीय योग दिवस दे मौके पर जिला प्रशासन उधमपुर आस्सेआ सुभाष स्टेडियम च बक्ख-बक्ख कार्यक्रमें दा सरिस्ता कीता जाग। उधमपुर दियां डिप्टी कमीशनर सलोनी राय होरें उधमपुर दे बसनीकें अगें अपील कीती ऐ जे ओह इस कार्यक्रम च सक्रिय तौरा पर शामिल होन।

<><><><><><>

## T-20 Cricket

आईसीसी टी-20 क्रिकेट विश्व कप च अज्ज अपने गुप स्टेज दे खीरले मैच च भारत दा मकाबला कनाड कन्नै होग। मैच फ्लोरिडा च भारतीय समें मताबक रातीं 8 बजे शुरू होग। एह्दे शा पैहले अज्ज बडलै वेस्टइंडीज दे किंग्सटाउन च दक्खन अफ्रीका नै नेपाल गी खीरले ओवर तगर चले दे रोमांचक मैच च 1 रंज कन्नै हराया। कल यूएसए नै सुपर-8 च पुज्जियै उसलै इतिहास रची दित्ता जिसलै आयरलैंड खलाफ उंदा गुप ए च इक महत्वै आला मैच लॉडर हिल दे सेंट्रल ब्रोवार्ड रीजनल पार्क स्टेडियम च लगातार बरा करदी बरखा करियै रद्द करी दित्ता गेआ।

<><><><><><>